


梅花溪詩草

錢梅溪

麓軒

十四





嘉慶廿四年刻

槁花溪詩草

履園藏板



余交錢君梅溪舊矣始君來吳門年未弱
冠能鼓琴善寫生兼通金石文字字尤精篆
籀隸古之書而天姿清妙如其為人初未
知其能詩也既而慨然出門歷楚豫浙閩
齊魯燕趙之間爲諸侯賓客者二十餘年
藝日益有名一時王公貴人莫不欲羅致
之得其片縑以爲重嘗以漢熹平石經不

傳於世爲書論語孝經大學中庸刻石學
宮以補其闕以先世吳越武肅王以下祠
墓圯廢譜牒散亾爲清復而修治之又作
述德編百卷成一家言厥功甚鉅是以宗
族鄉黨莫不敬其爲人余窺其意殆不第
規規于目前之榮名而直欲與古人相頡
頏幾莫能以一二測也余曩在京師與法

時帆祭酒選及見錄嘗錄其詩既又見錢
塘袁簡齋先生之隨園詩話烏程戴服塘
太常之吳興詩話阮雲臺宮保之定香亭
筆記先友吳枚庵之昂須集皆選其作乃
知梅溪之詩所傳海內者若是其廣且博
也頃余自都門歸梅溪過余歡然道故手
一卷詩屬爲是正讀之清新有法性情畢

露而天趣盎然直爲向之書畫藝能所掩
亦竒矣哉獨是回憶四十餘年聚散之迹
駛如駒隙余頽然老矣而梅溪卜居尚湖
猶孜孜矻矻於圖書金石之中迥然有以
自樂豈亦都元敬朱野航一流人耶聊書
數語於後不知梅溪謂我何如也道光二
年夏五月吳郡蔣廷恩書

梅花溪詩草題詞

潘奕雋

榕皋

吳縣人

梅溪六十生辰出示新詩即用卷中
春字韻題其集後兼祝大年

梅花溪上一詩人生與梅花有夙因嗅得
寒香清到骨吟來好句瘦通神趨庭鸞鶴
排行舞壓架琳琅耀眼新我欲抽帆訂偕

梅花溪詩草
隱南枝正報十分春

曾 燠 賓谷 南城人

題梅花溪詩集

錢郎別我久屈指今幾年重逢邗水上話
舊一慨然君年逾六十清癯好容顏導養
得真訣無事求神丹相形益吾老攬鏡憎
華顛君書擅能事妙入秋豪巔鐘鼎恣摹

榻金石供雕鐫作詩乃餘事亦復清且妍
空巖飛瀑冷碧澗疏花媽隱君想高致天
籟鳴風絃君住梅花谿我家青芝山他時
一隣卜茅屋需三間酒熟共謀醉詩成互
取刪此願定可遂先煩盟白鷗

汪端光 劔潭 江都人

調寄一萼紅又一體奉題梅花溪詩

草後

見丰標甚三高六逸能比得斯人薄惹京
塵平看宦海脩然粟里衣巾儘憑著牽蘿
補屋占江南一段水雲春小有園林多藏
書卷少置琴樽 六十平頭未老用朱竹垞句况
清言高詠如鶴聲聞字立苔碑詩添蓋篋
漢唐人恐輸君載酒江湖名一集聚天涯

海內盍簪新同與雕龍鑿鑿刻鵠津津

卷中

刻舊友原作
和詩甚夥

李兆洛

申耆

陽湖人

梅溪先生見示詩集即題其後

卅載諸侯老賓客九州山水半逢迎隨身
詩卷爲年譜著手清芬見性情石墨久推
當代冠玉梅早結歲寒盟與君同住蓉湖

畔何日扁舟載酒行

陳文述 雲伯 錢唐人

梅谿二兄以詩集見示敬賦長句

谿上梅花澹晚煙花香長拂舊吟牋青門

嘯傲書名重朱邱聲華海客傳 君在京師聲名藉甚名王側席

夷使求書者歲無虛日 感我浮蹤仍薄宦羨君偕隱早

歸田觚稜舊夢琅嬛事回首春明二十年

郭 麇 頻迦 吳江人

用雲伯韻

清才含雪語尋烟何用西崑待鄭箋妙墨

已空兩漢後新編合得萬人傳壯遊久謝

春明夢老境思耕白水田應笑江湖狂杜

牧阻風中酒尚年年

梅花溪居士傳

居士不詳其姓字宅邊有小溪種棊華百
本因以為號焉居士善鼓琴不齟齬于宮
商好讀書不亟亟于名利家貧屢空常負
米以養其父母西遊於宛洛東浮乎滄海
北走齊魯燕趙之間南至瀟湘雲夢兩淞
十閩所見名山大川可喜可愕之事一一

筆之書書不盡者則寄之畫人有勸其干
祿者居士笑不應父母既沒有二子能自
食矣乃發憤著書成述德編百卷喜為隸
古書又寫十三經以自娛世人莫不非笑
之而居士亦置若罔聞也嘗仿趙岐築生
壙植松楸預立一碑刻生平交遊名字乃
命其子曰昔皇甫元晏死棺中僅置孝經

一卷不設几位元酒而奠吾百年後汝等
其行之其風趣如此後移家釣渚十餘年
端居杜門蕭然自得遂挈妻子入虞山久
而不返不知其所終云

贊曰靖節先生嘗言張長公世路多端獨
養其志居士豈其儔與蓋飲河既足自外
皆休後千百年當必有知其志者矣

泳五六歲時即從先君子授四子書以至
讀經讀史爲科舉之文未嘗出外就傅比
長竊取唐宋人詩誦之遂效爲五七言體
旣不敢呈之先君子亦不敢輕以示人嗣
家旣中落無所成就始出門負米歷楚豫
溯閩齊魯燕趙之間偶有所作輒隨手棄
去零星片紙時時出舊篋中或見友人齋

壁實未嘗有藁也今年過半百終無進境
偶閱舊作反欲存之明知無師之學見笑
於知者而蚓歌蚊唱或有取焉起自乾隆
壬寅至嘉慶丙子凡得古今體詩二百八
十餘首使兩兒鈔錄之命曰梅華溪詩草
丁丑春日泳自記

梅花溪詩草四卷

目錄

- 卷一 計古今體詩七十三首
卷二 計古今體詩七十一首
卷三 計古今體詩七十六首
卷四 計古今體詩六十一首

梅花溪詩草卷之一

勾吳 錢泳 立羣

偶作

我生未弱冠委懷弄琴書澹然閱年歲自
比羲皇初朴真竊所慕智巧誠可祛漫言
窮與達且息南山廬

其二

錄錄苦終歲烏兔東西馳去者長已矣來
者猶可追讀書掩蓬戶古人以爲師高山
未能至我心嚮往之

其三

力田冀豐年力學冀聖賢苟不存此心畊
讀俱徒然嗟嗟利名客甘受世網牽一朝
赴邱壟千載誰悲憐

其四

寄形大塊間萬事何時已凍蠅觸窗鳴鬧
蛾撲燈死知進不知退自古皆爾爾所以
賢達人守身若處子

歲暮舟發吳門

天寒征鳥疾風急片颿開念我何爲者扁
舟幾度來煙波如許闊歲月謾相催極目

吳城路官亭又放梅

天寒吾家距西湖四百里思之十年不得
一遊乙巳三月始遂此願感余生之
無狀幸山水之有緣即事成詩欣然
載筆

十年夢踏錢唐路今到翻疑是夢中巒翠
不分南北寺花香頻度往來風數灣碧水

通行殿一帶蒼煙沒宋宮何處吾家表
忠觀幾回搔首問漁翁

其二

湧金門外水泔泔十里山光一棹分是處
樓臺飛燕子滿船簫鼓散鷗羣六橋柳色
橫青幃三竺香煙鎖白雲回首江城明鏡
裏數聲欸乃盪斜曛

其三

躍馬入山山四圍
梵王宮殿鬱崔巍
老僧迎客來幽徑
少女焚香上翠微
鷺嶺直標滄海闊
溼雲欲吸冷泉飛
何當高坐三生石
指點遊人去路非

其四

踞虎奔犀雙屐輕
松聲謾謾竹聲清
茗烹

龍井逢疎雨
鐘吼雷峰正
晚晴巒勢奔來
城約住漁舟
歸去月同行
榜人小歇孤山
路極目中流
無限情

履園叢話 乾隆乙巳歲余春秋二十有七始識袁簡齋先生于吳門偶與先生大論時文一時傾倒因呈西湖詩就正遂載於隨園詩話第十三卷及刻成後先生誤以泳為秀才嘗寄書求改先生答曰秀才二字在可改不改之間昔楊素稱孔子為秀才非今之生員也強辭奪理可發一劇

舟次雙亭

梅花溪詩草 卷一 五
犬吠夜冥冥人行湖上亭雁聲悲去艣螢
火落疎星世事如涼露生涯寄白蘋蓬窗
成獨坐愁對一鐙青

乙巳冬日同婁東王竹嶺 三錫金陵

張止原 復純遊畢秋帆中丞樂園爲

吾家廣陵王金谷園故址也

結伴城西路尋幽傲散仙名園傳五代喬

木歷千年暖閣真宜酒看山不費錢先公
遺蹟在惆悵白雲邊

其二

風流畢吏部卜築古園林不作閒居賦難
忘報國心文章推鉅手儒雅託鳴琴何日
開三徑來聽白雪音

其三

憶昔吳門客蹉跎感歲華

泳以壬寅歲曾寓園中

讀書曾

寤宿懷古一咨嗟鶴室尋清夢琴臺坐落花而今增勝概我欲向人誇

其四

張王皆妙手翰墨共沾濡樂府開新詠輞

川作舊圖

竹嶺繪園圖止原題七古於後

頓令幽興遠翻恨故

園蕪好待梅花放重攜酒一壺

答徐復堂

應階

雪中送別之作

衝寒棹扁舟言別徐孺子牽衣飲我酒念我風雪裏揮手暮江頭梅林宿鳥起

題蔣湛華孝廉

業謙

雪藕調冰小影

蓮花如幕水如油雪藕調冰樂未休一曲滄洲秋月好庾郎千古擅風流

昔年理琴有感

昔年好鳴琴幸遇鍾子期山水志吾道調
古心相悲斯人已厭世欲問和者誰清夜
不成弄淚滴枯桐枝

乾隆丁未歲九月將赴汴梁自丹陽
至京口夜泊詠懷四首示陳雪樵上

舍廣寧

振楫發丹陽兩岸多荒草江近秋水濁路

迴寒風早鄉國豈不念所喜良朋好夢溪
何處尋俯仰傷懷抱

其二

懷抱何時開遊歷從茲始矯首道路長濛
濛白雲裏江國秋風多征帆疾如駛天空
海氣白日暮山光紫風景殊異觀那似故
園美坐臥心若失感歎中夜起

其三

夜起何寂寥仰觀明月孤哀鴻隱蘆葦霜
氣侵肌膚平生愛清曠行役非良圖顧影
空悲涼即景聊自娛忽聽潮聲來舟師各
驚呼

其四

驚呼動我神推篷問前路漁火浮遠波白

煙斷江樹秋高風正悲客舫莫敢渡維纜
欲沽酒荒城滿霜露還坐殘燈前中懷亦
難訴堪笑人去來不及沙上鷺

出楊子江同雪樵作

浮玉峯頭風力邁四圍煙景望中收海門
日湧鼉鼉伏瓜步洲寒蘆荻秋萬里雲山
趨北固六朝金粉付東流舟師不識興亡

梅花溪詩草 卷一
事指點蒼茫起暮愁

順風歌

○不聞人聲但聞水聲一日挂帆一千里若
欲載我空中行羣山萬壑左右分江南江
北相向青我來乘風破犇浪仰天長嘯追
雲征人生宇宙寒暑更百年飄泊空傷情
何時拋得名利輕蓑笠歸釣滄浪清

渡淮水見漂沒民田數萬頃感賦

淮瀆滔滔控數州東馳千里未能休屢看
禱廟尋三井誰復探源導上流秋潦漲時
成竄鼠阪田沒處有浮鷗幾回問渡斜陽
晚白草黃沙漫野愁

穎川道中遇林鐵簫李舟二首

穎水流不息楓林落日黃扁舟獨西走羣

雁向南翔兄弟經年別關河去路長蓬窗

無限意還見野鴛鴦

水邊鴛鴦甚多

暮寒泊邨店沽酒指青旗犬吠閉門早樵

歸生月遲喜聞鄉國信況有故人期相對

挑鐙坐舉杯聊酌之

十二月十日同方子雲

正澍

洪稚存

亮吉徐朗齋

嵩凌仲子

廷堪

遊汴城

北上方寺

言遊上方寺鐵堦聳雲長衰草没人跡梅

花何處香周藩空瓦礫良嶽最淒涼不盡

登臨興閑吟送夕陽

蘇文忠公生日設祀詩為畢秋帆中

丞沅賦

眉山鍾靈蘇氏出一時父子三峰立奇才

卓犖推長公文字光芒造雲日中丞雅望
輝後先特立柱石當中天年豐人樂慶無
事爲公誕日張華筵前庭列兵衛後庭肅
冠裳惠肴旣蒸酒旣揚玉彝金爵交明光
門生屬吏多文章趨拜遺像堂中央簫鼓
作兮殷如雷美人和兮舞徘徊不知東閣
殘月起官梅欺雪爭初開雲中車馬何有

哉焚香上接金銀臺燭光搖搖風瑟瑟屏
氣恍惚靈之來吁嗟乎元祐至今七百年
讀史想見公生前自是君身有仙骨用少陵句何
妨萬里投蠻烟天子當時旣相識禁中對
泣何漣漣乃知不相亦有命後人尚論猶
爲憐嗚呼使公際遇如中丞立功立德當
比嵩高平

履園叢話 畢秋帆先生自陝西巡撫移鎮河南者計七年先生於古人中最服蘇文忠每於十二月十九日輒為文忠作生日會懸明人陳洪綬所畫文忠小像于堂上命伶人吹玉簫鐵笛自製迎神送神之曲率領幕中諸名士及屬吏門生衣冠趨拜為文忠公壽拜罷張燕設樂即席賦詩者至千餘家當時稱為盛事迨總督兩湖之後荆州賑恤既罷苗疆兵事又來遂不復能作此會矣嗚呼以公之風雅愛客今無其繼而沒後未幾家產絕沒子孫式微可慨也已

汴梁節署除夜同洪稚存作

鈴閣清嚴夜氣寒椒盤靜對綵燈懸離家

屈指纔三月把酒回頭又一年爆竹不驚
遊子夢官梅多感主人賢

嵩陽吟館小閣前新植梅花數株

明春

擬欲登中嶽華蓋峰頭望日邊

附刻

陽湖 洪亮吉 稚存

丁未除夜與梅溪先生同賦一律

元旦復作此索和

青帝黃人爾許忙靜看歲月去堂堂禰

衡一刺須投孔枚叔三年却住梁緣檢
故衣搜畫篋愛延晴日曝書倉到門一
片方音異爆竹聲還似故鄉

汴城東門乘馬至黑岡口二首

鞭馬出夷門秋風開素襟感茲芳草路感
我白雲心木落知時節城荒自古今據鞍
重問訊容與綠楊林

忽訝河流白聲喧落日中帆飛皆退鷁天
遠正來鴻劃破塵蒙界翻疑造化空太行
何處是蕭瑟起邊風

夜泊睢州大壩河神廟下

朝行發儀封夜泊河神廟蒼茫四郊黑但
聽風水鬧舟中多良朋呼燈暢談笑有時
撫琴歌劃然變長調或坐或高臥各各隨

所好初疑萬馬奔。刀兵勁喧噪。忽似霹靂
飛恍惚。從空到。或洪若鼓鐘。或大若壘器。
或如虬松吟石洞。號萬竅。又如暴雨來。虎
豹空山嘯。聞之喪我神。披衣起登眺。風急
沙糢糊。隄高勢排鼻。寂寥萬象空。星月相
照耀。嗟我遠遊子。風塵任顛倒。立地如深
淵。津路當據要。偶然一失足。人事那可料。

有志無時申。欲語何從告。還坐獨沈吟。捫
心自悲悼。

彭城

彭城自昔起英雄。指點青山說沛公。百戰
龍蛇原有別。千年湯沐亦成空。草生廢壘
寒雲黑。河繞孤城落日紅。夜聽黃流眠不
得。聲聲猶似泣重瞳。

登雲龍山放鶴亭

昔人鶴去不知歸，留得孤亭伴夕暉。
四面青山圍作郭，滿城紅樹繡如幃。
雲深徑滑難扶杖，葉落風清好試衣。
我憶蘇耽舊時蹟，不堪惆悵數鴻飛。

己酉三月遊焦山作

散步朱方道，春風霽色開。
半生空夢想，今

始涉江來樓閣連，雲合波濤作雪堆。
古今尋隱客，何必到蓬萊。

其二

僧菴有十六，徑曲白雲深。
不識焦公洞，誰知隱士心。
千年留勝蹟，三詔費招尋。
今日懸崖上，還多息影禽。

其三

我更摳衣上言尋瘞鶴銘雷轟殘石黑雨
剥蘚苔青椎搨生寒霧摩挲看曉星紛紛
好事者猶為擬全形

其四

覽古分周漢題名讀宋元銅頑何載造崖
缺幾人存幽鳥鳴山曲小桃臥竹根當前
真骨董人盡不能言

其五

絕頂一亭立飛帆四面浮烏雲吞落日白
浪擁層樓勢壓千峯壯門迎萬里流恍疑
天路近更欲上攀遊

其六

徑險蒼苔滑山僧傍我身鷹飛如送客潮
上欲留人指點尋歸路蒼茫更問津挂帆

赴漁舫載得一江春

太子磯阻風

祈神禱壘兩無功
日日磯邊候轉風
若肯回頭輕撥棹
一帆直到海門東
去秋東下江南路
千里黃流一日分
順逆總憑旂腳轉
人生須早得風雲

潯陽舟中望廬山二首

朝發潯陽江遙望香爐峯
百里連青蒼千巖勢
龍嵒境幽罕人接雲迷
訝天通奔恍未能往亦足蕩我胸

嘗讀石門詩渺若登靈闕
想見諸道人拂衣步空碧
此事千餘年仙雲久隔絕
惟有

鮑參軍凌風幾探闕

案鮑明遠集有登廬山及香爐峯詩

過黃州月色甚明因泊舟城下弔東

坡先生

東山初上月江水自中流赤壁固無恙雪
堂猶在否孤舟留枕席人世總浮游兩賦
傳千古光芒射斗牛

八月十日余將回江南方子雲洪稚
存徐朗齋諸君餞余黃鶴樓吹笛賦
詩月出而罷

倚樓橫笛未成音雲影飛來似有心黃鶴
不歸雲不去一詩傳誦到如今
晴川閣上月初環鸚鵡洲邊對別顏惟有
大江流日夜不知何處是鄉關

泊烏江謁項王廟

不渡江東忍自亡天心人事本難量英雄
自足有千古香火至今留一方叢木秋風

梅在溪詩草 卷一
餘殺氣鬼燐暮雨落星光我來艤棹寒塘
晚惟聽江流悲未央

挂席

挂席西江夜扁舟疾欲飛
唵高驚白鷺燭燼倦青衣
沙渚還留月漁邨盡掩扉
為耽山水癖飄泊未成歸

題陳雪樵長春園圖後

兩年三到長春園主人宴客開東軒
幽花瑤草四時好山水一碧通仙源
今我歸帆泊京口披圖還飲蘭陵酒
回首江天路欲迷空對秋風幾株柳

擬樂府歌詞

上之回

上之回駕六龍鳳旗喜飄春風細柳北甘

梅在溪詩草 卷一 已酉
泉東所臨歷多離宮蕭關路狹多垂楊羣
花紅襯鑿輿香陋儒獻書跪道旁皇帝萬
歲樂未央

將進酒

憶我趨庭時常著萊子衣上堂將進酒雙
親喜相持堂上撫琴瑟堂下歌清詞舉觴
祝長壽雙燭生光輝娛親當爲樂何忍一

日離今隔天之涯慚愧爲男兒
有所思

有所思乃在南山之南北山北上有五色
之祥雲下有仙人之石室嘯詔當中天不
管日與月世途齷齪何足云功名富貴徒
紛紛請看雒陽佳麗地碧苔瓦礫多邛墳
歌一曲空歎息有所思何時得

東海流面前崑崙崙崙時背後日月懸我頭風
雲落我手人生百年春復秋何爲戚戚千
年憂仰天問天天不對今我不樂將何求
吁嗟今我不樂將何求

黃雀行

棲莫向宮殿棲食莫近太倉飛太倉宮殿

非不美須知人世皆危機嘖嘖復啾啾蓬
蒿不吾棄寒投松柏林饑啄逍遙地一朝
若遂凌霄志避網避鵬等閒事

隴頭水

彈我膝上琴長歌隴頭水隴頭水吼隴阪
長十萬健兒色如死驅馬前行不忍聞牽
旗斬將如風雲繫得樓蘭獻天子功名應

讓霍將軍

折楊柳

堤上生楊柳堤邊春水流
枝長繫走馬絮落襯眠鷗
南陌添新別江樓鎖舊愁
寄言莫折盡留待綰歸舟

箜篌引

濁流拍天山若舟怪風落日
鼉鼉浮公無

渡河公竟死捐棄性命輕
蜉蝣東鄰小婦彈箜篌
行子竊聽雙淚流君不見
世人自投網欲救不得心
煩憂

猛虎行

昔年猛虎食人肉寡妻老母空
山哭今年猛虎斂避人強弓
毒矢翻成羣偶然結黨放
牙爪白鹿黃獐同一飽
弓矢雖多黨更

多嗚呼奈爾猛虎何

行路難

行路難心腸結朝衝黑風暮吹雪馬墮深
谷車輪摧怪獸毒龍啖其血太行雖險吾
不愁蜀江雖深吾不憂人心呼吸間覆車
還覆舟

烏夜啼

夫走遼東阿母死夜長悄悄空房裏烏棲
庭樹啼不休欲眠欲起增離愁一聲歎息
驚飛去忽夢當年送行處

夜坐吟

殘燈欲死心欲灰沈吟酒醒明月來珠簾
不捲風自開落花搖影鋪蒼苔美人兮美
人對面恍隔千重雲世間萬事易爲識誰

識我儂離別新

十願詩

并序

昔陶淵明作閑情賦言蕩以思慮而
終歸雅正將以抑邪心助諷諫也閒
居無事因演其詞作十願詩

願在衣爲領彎環稱華首珠玉燦成圍將
擬緘其口世人尚輕薄徒知論妍醜

其二

願在裳爲帶結束窈窕身年來漸消瘦不
復長相親人心易溫涼翻羨紅羅巾

其三

願在髮爲澤朝朝刷蓬鬢烏雲潤欲流簪
花自相映猶恐滑金釵時來照明鏡

其四

願在眉爲黛能令媚朱顏欲比青山色還
同明月彎年年學描畫中心自相關

其五

願在筦爲席安眠病中體相思又暮春慊
慊未能起昨得兩行書宛轉心獨喜

其六

願在絲爲履素足相周旋刺成合歡花喜

作同心蓮一自踏青歸雙雙棄牀前

其七

願在畫爲影同憩花陰下冉冉獨自行依
依兩難捨還坐綠窗前我心尚能寫

其八

願在夜爲燭不許明月來相對各無言傷
心已成灰寂寂空房中雙花爲誰開

其九

願在竹為扇含風送餘善涼燠兩心知恩
情未嘗轉祇恐秋聲至棄捐付空館

其十

願在木為桐製作膝上琴一彈傷別離再
彈淚盈襟君子期不來千載誰知音
登西山石壁觀太湖

踏遍巉巖上石臺波濤滾滾萬山開一筇
獨立憑西望惟有孤帆天際來

男

曰奇 曰祥 偉堂 益生

謹校字

梅花溪詩草卷之一

梅花溪詩草卷之二

勾吳 錢泳 立羣

庚戌二月十四日偕王夢樓太守文

治潘榕皋農部奕雋暨其弟雲浦參

軍奕基張止原上舍復純遊畢秋帆

尚書靈巖山館信宿而歸

刺船載酒訪平泉正值江南二月天兩岸

好花添畫藁一陂春水作吟箋名園自昔
留人醉逸興如今讓客先况有鸞臺仙吏
在飄然同結出塵緣

其二

山肴野蔌滿前陳晚飯呼鐙笑語頻待月
何妨琴作枕聽鐘恰喜佛爲鄰願憑泡影
觀前事長託閒雲寄此身飽暖起居皆是

福扁舟還載五湖春

其三

年來鹿鹿走塵寰水陸驚心歌路難欲逐
魚龍翻浪出竟輸斤鷄宿枝安恣遊敢說
詩囊富謀食羞將劔鋏彈笑我山林緣分
淺從今不作畫圖看

其四

東風作雨響山湫並坐當窗樂未休松色
模糊藏鳥語巖花飄落出泉流山深雲霧
生衣袂興發詩篇集唱酬惟恐勝遊難再
得相期更卜洞庭秋

與諸公相約
有洞庭之遊

同作

吳縣潘奕雋

榕皋

芝原梅溪邀遊靈巖山館賦詩二
章錄呈郢正

夾路松風引竹篴討春排日到平泉天
因遊客開晴景人與名山有夙緣是處
憑軒呈畫本暫來小坐即神仙聯吟促
席皆詞侶月上何妨借榻眠

畫船雲壑敞山房信宿句留味儘長萬
木排煙環曲榭衆峯攢翠入虛堂 御
書樓壓涵空閣漱玉泉來響牒廊却笑

西山遊屐少酸寒今不數宦光

脩禊日同彭尺木進士紹升潘榕皋

農部奕雋張東畬大令應均郭匏雅

國博毓圻陸謹庭孝廉恭張芝原上

舍復純集畢秋帆尚書樂園觀所藏

法書名畫彈琴賦詩暢飲終日二首

興從惠風發人與和氣遊俯仰六合間何

事多營求花謝實還結時良去難留有懷

王右軍一序垂千秋

羣彥多仙儒文章斑陸離當此暮春天幽

懷愜心期詩成酌清醕醉餘理金徽臨流

各相對笑彼浮雲飛

同作

吳縣 潘奕雋 榕皋

樂園脩禊同張芝原彭尺木張東

畚郭匏雅陸謹庭錢梅溪

浮生住世間所遇無不可譬諸旅寓客
百事豈由我慮澹物自捐寧復知瑣瑣
良辰邀古歡幽討期竟果一鳥鳴林端
兩蝶集花朶未能與道融差喜與俗左

其二

今日惠風和相過談在昔神仙與賢達

翰墨留遺蹟是人今已亾存者亦糟粕
糟粕不可磨偏視精奕奕想當揮毫時
意豈計工拙掩卷吾忘言白雲蕩空碧

其三

脩禊古遺俗用以袪不祥不祥孰爲大
先當袪其腸俗腸旣可除可以進一觴
同心六七人落落猶與狂清譚閒新詠

恍惚笙簫簧何當脫餘累汗漫從雲將

其四

彼亦一是非此亦一是非千載更相詆
是非究安居達人悟其旨四問四不知
死生既可一得喪何所期却笑誓墓者
彭殤猶未齊惟應漆園叟可與和天倪

又

長洲彭紹升尺木

庚戌三月三日錢立羣招余往畢
尚書第觀尚書所藏法墨以當脩
禊之會與者張止原潘守愚張星
躔郭載春陸孟莊守愚先成古詩
四首有超然元覽之意余輒繼作
以廣其悒

端居了晨課有客貽我書云茲脩禊節

相於尚書廬評賞古法墨遲日頗有餘
 到者某某在君能一至與余應之曰諾
 飯罷徐往趨入門揖數子開卷同歡娛
 香光竝松雪濯濯出水藻楷法擅文祝
 骨瘦神轉腴君謨稱妙品如槃走圓珠
 數公俱不朽風流美且都生來嬾握管
 對此增長吁德成與藝成緩急其何如

願言從所好還我結繩初

其二

文公天上人落筆雜行草

朱子城南詩數百字倣魯公爭座藁

中有真氣流虛空出麟爪仰之何蒼蒼

即之殊矯矯同時紫清翁

白真人玉蟾

獨立三

山表偶焉駕虬螭傲睨乾坤小斐然錦

繡文秃筆一以掃儒仙豈異源所貴絕

梅在溪詩草 卷二
諸惱但得摩尼珠一照無不了休作墨
池賓坐待朱顏槁

其三

一切法無生一切法無滅云何寂光中
枉自起分別蘭亭有遺篇俯仰增悲咽
豈知御風人脩然謝涂轍隨處是山林
招要足賢傑朝聞在澗勉今古同一呷

春沂詠而歸餘響都未絕

長洲陸

恭謹庭

和張丈東畬韻

清時合繼永和遊載酒名園挈侶儔節
屆重三宜燕賞朋來五六喜鶯求當年
逸興臨文寄此日幽情藉古搜最是風
光來瞥眼好隨鶩絹寫曾不

止原梅溪已寫
樂圃脩楔圖

尚書行樂紀遨遊

是日出示畢秋帆尚書行樂圖

野綠平泉

洵足儔早集梧岡舒鳳翹還開竹徑友

羊求幾叢花木金鈴護列架圖書鐵網

收遊目騁懷容我輩山陰觴詠勝今不

履園叢話

庚戌歲三月三日余寓畢秋帆尚書樂圃

林居時正刻經訓堂帖遂取松雪齋所藏蘭亭五字未損本及唐徐季海朱巨川告懷素小草千文蔡君謨自書詩藁蘇東坡橘頌陳簡齋詩卷朱晦庵城南詩白玉蟾草書卷虞伯生誅蚊賦趙子昂枯樹賦及文衡山祝京兆董思翁墨蹟置之案頭同觀者為彭尺木潘榕皋

張東畚郭匏雅陸謹庭諸先生彈琴賦詩暢飲終日為一時佳話忽忽廿餘年諸公半皆凋謝卷冊亦已散亡惟經訓堂帖石歸然獨存金石之可貴如此

四月廿八日蔣立厓司馬

業晉席上

得句呈袁簡齋太史

枚

即送歸隨園

二首

總角讀公詩十年勞夢思今逢文宴會宛
與古人期花月三生債江湖兩鬢絲爭攀

聽快語命酒故遲遲

風流開後輩著錄付門生
獨坐倉山暮冷看塵世情
俸餘留鶴供興發逐雲行
指點秦淮路愁聽說去程

陸少室

元溥

病不見客作此投之

廿年壯志絆家貧
湘管揮殘自寫真
白社盡推修月手
青衫先作臥雲身
一妻勤儉

兼僮僕半榻沈吟自主賓
莫怪當堦苔易綠
門前還有素心人

題如皋喬墨莊

林印譜後

墨莊好古無不備
鐵筆閒來作遊戲
金玉竹石爲君牋
寫出周秦已前字
九天風雨蟠蛟螭
芝泥濡印紅淋漓
史籀失色李斯哭
却笑世上無人知
我昔吳門初識君
索

詩求畫兼論文今君傳有佳兒子筆墨神

奇更絕羣

令子昱能畫
兼工鐵筆

七夕戲作和王夢樓太守韻

昨宵風雨折池蓮一霎銀河落眼前笑我
良期長在客恁恁虛度十三年

一鈎涼月欲西沈幾縷名香繞畫屏我妒
雙星還下拜閨中應亦拜雙星

題陳雪樵騎尉

廣寧

壽雪山房圖

窗留太古雪彷彿峩嶷巔白雲凝高空不
知幾何年卻笑寒梅太多事春來欲鬥天
公戲幽香自謂已過之一夜東風吹滿地
君不見崑崙高堯時積雪千青霄那知人
世有炎熱更比梅花容易消

題徐朗齋孝廉芙蓉湖上讀書圖

是圖

在京
師作

十年水陸路
蟠蟠歸夢醒時
思萬端君亦
不忘鄉國好
青山圖取袖
中看
芙蓉花發水
風清恨不相
從一葉輕我
本湖邊垂釣
者他年來聽
讀書聲

九月八日同喬墨莊張芝原徐朗齋
江鄭堂登虎邱淡香樓

人生會合最難期
今對諸君轉自悲
壯志漸如紅葉墮
素心惟有菊花知
百年身世防虛擲
此日登臨合賦詩
猶恐忽忽容易
別淡香樓上坐
移時

同作

金匱徐嵩
朗齋

和梅溪

吳門木落水雲涼
相約晴遊引興長
異

地最難逢老伴登高何必定重陽畫船
野渡琴尊滿山寺秋深松鞠香但願年
年成此會數行新雁過橫塘

舟發吳門

開歲雨雪多十事九成拙行子待春和今
初與家別振楫金閶門蓬背微風拂月斜
人語稀溪迴水聲疾笑我苦奔波湖海生

華髮行樂負青春驚心作生活何當乘白
鷗一飛渺天末

望亭

春到江邨景物新扁舟何處問仙津月斜
野店關門早高矗紅燈引路人

京口舟中聽雨

空江愁獨夜聽雨倍神傷城鼓嚴傳警濤

聲吼未央燈昏勞遠夢蓬漏濕行裝明日
猶晴否扁舟路正長

同崔雲谷瑤遊莫愁湖

莫愁湖水碧粼粼兩岸垂楊覆白蘋一自
畫眉人去後問誰占得十分春

美人才子總淒涼留得芳名土亦香今日
勝碁樓上望伊人宛在水中央

辛亥春日寓蕪湖長春園吳盤齋孝

廉桓以詩見投即次其韻兼呈陳岸

亭明府聖修及令子恒齋廣興雪樵

廣寧 昆仲

年來奔走若流星又到坡公湖上亭芳草
多情留雪爪春風著意合浮萍半窗舊夢
花前落一曲新詩月下聽最憶斜川尚行

梅溪詩集 卷二
役早來共折柳條青

時雪樵尚未至
鳩江故及之

附刻

無爲 吳 桓 槃齋

讀梅溪先生見和詩再寄二首

俾來開寶墨芳訊慰離思佐體高時輩
詩裁與古期雅真傾蔣濟醇已感袁絲
但恨過從少寧嗟相見遲

兀坐郡齋冷深慙鄙吝生臨風欣遠慕
連雨釀離情湖漲知誰溯園芳想獨行
狙獠囊裡物頻望示吾程

會稽郡齋作呈李曉園太守 亨特

秋老吳門逸興催扁舟又渡鑑湖來西陵
風雨三更夢南國雲山一望開沽酒不辭
浮綠蟻訪碑何處剔蒼苔越王臺殿雲門
寺從此登臨看幾回

其二

蓮幕英英集世賢
令人想見永和年
畫追北苑空今古
詞逼東坡暎後先
謂陳斗泉姚秋槎
坐有琴書忘作客
醉扶花月傲成仙
笑他蘭渚山前寺
只把詩文石上鐫

其三

鎮東樓閣對三峯
峰勢崢嶸繞卧龍
鏡水

秋風愁釣艇
靈臺落日響寒鐘
漸看柏葉紅
千樹指點涼雲暗
幾重聞說先秦殘石
在何當策杖問遺蹤

秦會稽石刻宋時王梅溪與梁安老訪得之聞至今猶在

其四

每逢佳節在天涯
且喜湖山路未賒
十載遡征先白鴈
幾番愁悶負黃花
吹噓誰辨柯亭笛
浪走空隨博望槎
只有琴書忘未

了興來還到鄴侯家

其五

公庭事簡晝長關一任浮雲門外閒自昔
繁華稱澤國此中樓閣擁仙山歌聲夜沸
民爭聽雲影朝飛鶴自還恍在伯駒圖畫
裏果然瀟灑異人間

辛亥除夕同姚秋槎別駕

興潔賦兼

呈曉園太守

聲聲爆竹破雲寒置酒高堂興未闌惟有
官梅知我冷愧無白雪向君彈十年樂事
回頭過雙燭生花帶笑看幾欲探春上林
去為懷明德更盤桓

白桃花和張芝原韻

春來無處散煩襟且把桃花耐苦吟獨與

梨雲同絕艷不隨梅雪結寒心銀墻露泣
珠光滿玉洞風微月色深聞說仙源春更
好刺船欲訪到而今

泊天妃閘

淮水并黃勢不敵怒走清江亂噴激江頭
鎖鑰重重封淮水愈怒流洶洶驚湍奔雷
響霹靂急溜滾雪翻鴻濛蛟龍夜吼深淵

裏行舟到此誰敢艤鳴鉦擊鼓相叫號健
卒如雲挽不起我昔南歸幾度過搖櫓一
擲舟如梭而今欲上不得上空立船頭喚
奈何

京師臥病

三十無成志欲灰况逢臥病滯京隈半生
落魄憑誰說百種傷心有夢回梧葉驚風

催節轉槐花雜雨打窗來
昨宵幸得平安信
差勝庸醫藥一杯

夢遊仙歌為奇麗川中丞豐額賦

中丞風骨有仙氣
曾賦梅花作長句

中丞有梅花詩

九首示余奉詔南行齊魯間恍惚夢與神仙遇

蓬萊宮闕祥雲開
王母車駕翻空來
華妝玉女奏天樂
歡呼排列金銀臺
羣仙如麻

不暇接惟有東方若相識
誰道仙家不老春
鬚髮皤然亦如雪
崑崙滄海何處尋
兩袖翼翼清風生
下看岱宗小於芥
一聲鶴唳東山明
我聞此語重咨嗟
舉杯對坐餐紅霞
他年倘許來入夢
願向公門掃落花

寄家信

旅館西風天正寒
為傳鄉信報平安
病童

欲睡燈花落幾度封完又拆看

早行

撲面霜花冷如鉤月在天升
車猶擁被躑躅不成眠
馬自知歧路雞能破曉烟
忽聞茆店近沽酒弗論錢

象山雜詩

象城景物逐時新
城上青山欲結鄰
沿水

桃花幾千樹我來恍作武陵人

其二

老翁小住白雲隈
花藥紛紛手自栽
莫笑貧居無長物
遙峰一角過牆來

其三

風景依稀似赤城
峯頭常看濕雲生
不知夜雨添多少
鳳躍溪邊聽水聲

其四

海魚爲飯酒爲年醉後行吟便欲仙石屋
歸來天未晚一鑪活火煮丹泉

山下有陶隱
君煉丹井

石屋八景詩和陳雪樵騎尉

雨香庵

結庵山中居羣花繞其側春風昨夜來吹
成衆香國趺坐悄無言悠然悟空色

聽秋室

有聲來林端撼撼鳴未已不寐生微涼牽
衣夜中起惆悵月輪斜落葉滿階肥

眠雲塢

山鷗爲我牀松雲亦吾幄醉向鷗中眠雲
生不知覺堪笑塵世人端居尚華縟

招鶴峯

支公既仙去鶴唳西山四日暮不歸來傍
人徒見招何當借雙翰飛上青雲霄

洗心池

鑿池通仙源一泓深見底人心既匪石水
清亦難洗何如水中魚搖漾波瀾瀾

指迷石

白雲障空山樵牧不相遇有石立崢嶸引

我上方路逕險沒蒼苔踟躕幾回顧

流華澗

幽澗鳴琮瑋花落隨流行溶溶水生色點
點香有聲忽興逝者歎香色空多情

移情臺

昔年好綠綺專一情難真今到蓬萊山豁
然通我神更願東入海冀遇方子春

原唱

山陰 陳廣寧 雪樵

石屋八景詩 并序

象山縣石屋在丹山南勝境頗多
惜僻在海嶠無騷人韻士品題遂
至巖壑蕭條蒼苔滿徑邑之人幾
無過而問者乾隆癸丑四月余攝
官來茲與友人徐君雪亭錢君梅

溪共題八景命工刻諸崖石並賦
短章紀勝非敢謂是山之美因人
而彰亦望同志者繼聲焉

雨香庵

異香從何來遙望彌天雲冉冉不知處
祇向空中聞借問幾時散于焉悟靜因
聽秋室

松泉聲泠泠常帶蕭爽意幽坐高齋中
傾耳得深趣怡然澹無言問有涼歸未

眠雲鳴

飛雲嶺頭來流入深鳴綠幽客此高眠
相對興自足行雨須出山不遣更棲宿

招鶴峰

何處鶴飛聲遠在青天半高峯一揮手

翩翩雲影亂定許便歸來伴我撫琴案
洗心池

池水深尺許試問清誰似我心不染埃
祇願長如此却笑買名人洗耳徒貽恥
指迷石

山深忽無路峭崖知遠近蘚石認舊遊
使我興彌盡大道高若天試問誰相引

流華澗

溶溶幽澗泉遠逐清香去輕萍相與浮
借問幾時住山風水面來紅散不知處

移情臺

石臺當高空有客此鼓琴海水忽洶涌
余情相與深即此是蓬萊應悟成連心
題高孝二陵墨蹟後 并序

趙君洛生

魏

宋之苗裔也家藏高孝

二陵墨蹟諸公跋之詳矣獨念趙氏
有恩於先世今越數百年後而洛生
復與泳訂金石交豈佛家所謂緣耶
爰題二詩以識冊尾

石經剝落長苔痕遺恨冬青不足論留得
二陵真蹟在蓬門猶識趙王孫

焚香再拜啓題封想見揮毫德壽宮龍鳳

昇天陵谷改尚餘文翰見清風阜陵書在團扇故云

過嚴子陵祠堂

直鉤釣國曲鉤名富貴原無足重輕我亦

久忘名利者合來祠下拜先生俗傳往來客商從不謁祠謁者

輒不利以先生不求名利故也

祠堂傾側草蕭蕭奉祀雲孫亦寂寥猶有

先人家法在多因避客混漁樵有子孫數家奉祀事者是日俱

上山樵采不見一人

羈宿

羈宿愁無寐門開山驛中夜明千嶂黑野

燒半天紅豺虎何時絕艱危到處同烏啼

雲欲曙獵獵吼西風

望江郎山

三峯矗立勢崔嵬雲樹蒼茫入望來直上
定窮千里目排空誰遣五丁開花園岡斷
寒烟塞楓嶺營高白日頽欲宿山家燒晚
飯竹堦橫坐首重回

度仙霞嶺逢吳門李十二

仙霞高不極曲折度層巖徑險疑無路山
深欲隔凡流雲穿洞壑急雪響松杉爲遇

南來客家書寄一緘

燭淚

光黯月初上花開風正搖傷心誰似我流
淚度清宵

自浦城泛舟至延平津

暝投浦城郭旦登清流舟四山鬱嵯峨對
此生百憂初疑陸地行忽至溜水頭急湍

響霹靂篙刺交戈矛飛舫疾如箭一往不
可收崩崖利如刀森列爲我仇白雪翻迴
波青虬吼靈湫奔騰勢初平怪石當中流
任觸恐顛覆欲避難自由榜人跪焚香行
子驚未休我聞呂梁壑水湧高層樓又聞
蜀江深險亦如此不雙劍已成龍一水名
空留回頭碧峯遠思逐羣飛鷗

過黯淡灘

我過黯淡灘慄慄心膽寒狂流噴激走白
雪挽舟不動登天難羣峰鬱蒼蒼惡石立
齒齒白日欲落西風喧舟師相對色如死
安得神禹驅山鞭盡把亂石東海填樂浪
島夷入中國樓船盜賊殲窮邊不使行人
歷奇險平水來往無拘牽驚悸不能止嗟

吁發浩歌既怪治水鑿不到又傷人世多
風波從今歸臥滄江上試看風波奈我何

次水口驛

扁舟泊水口古驛暮雲多山禿留紅樹灘
平漾碧波寒風喧岸竹人語入烟蘿指點
榕城路揚帆發棹歌

登福州堅牢塔觀僞閩王延曦石刻

題名

瑯琊建國太忿忿兩世兵戈一霎中負海
自居天子座因山猶築梵王宮至今殘石
留名姓細辨題年記永隆極目孤城思往
事塢鈴無語怨東風

建河歸棹詩

建河天下險說起便增愁衆水趨崩壑羣

山夾亂流身居烟靄國家在木蘭舟最怕
前灘急停橈更綰留

其二

落日張湖坂奔流勢漸平忽鳴巫峽雨又
激海濤聲對飯誰能食推篷暗自驚仙霞
望不見惟有暮雲征

其三

夜泊延平驛津頭月一彎悲風號獨樹野
火燒空山干莫何時出斗牛不可攀我來
憑弔古歎息水潺潺

題范安仁魚藻圖

每因秋至憶蓴鱸况見江鄉魚藻圖從此
扁舟歸去好一竿煙雨伴雙鳧

題陳孝廉

希濂

澌水舊廬圖

在金華
府城外

昔人釣遊處今人尚仰止况子先世廬乃
在佳山水前聽波潺潺後枕石齒齒春風
松竹香蒼翠搖滿几吾家金華侯有墓城
東起碑碣荒荆蓊春秋廢禋祀欲往問遺
蹤感嘆不能已
先金華侯元懿為武肅王第
五子墓在府城東北五里 惟君念
舊德繪圖縮藤紙雲木雖荒涼邱壑差可
擬長山何巍巍澌水何瀾瀾有懷張志和

還憶徐孺子他年結伴行撥棹烟波裏

養蠶詞 并序

余鄉風俗不事蠶桑今年春內子偶
以十錢買蠶種至三眠時遂得數萬
深窗飼葉晝夜不遑始知蠶事之甚
苦也因作六詩以示內子

拋却金針學採桑朝朝雙手綠雲香蠶饑

蠶飽添憂喜贏得深閨日夜忙

其二

三眠欲起日初融人在紗牕第幾重
不管花開與花落春來一月鬢雲鬆

其三

守護筠籃到曉看空堂風雨一鐙殘
支持兒女眠初穩十萬生靈正待餐

其四

一回飽飼一桑空八百成都技奏功
却笑紛紛閒草木虛名半落軟紅中

其五

繭作同功箇箇肥繅聲軋軋亂鳴機
絲綸吐盡爲人用留得輕身一對飛

其六

堂上

丙辰

堂上孀姑八十餘不愁衣冷奉登輿更令鄰婦家家學變俗應從汝最初

和作

烏程戴璐 蕨塘

題梅溪養蠶詞後即用憶吳興詩

韻

愛將桑柘代繁蘋繭館初營不染塵從此梁溪增婦職春來比戶祀蠶神

九龍山翠裊晴煙軋軋聲喧四月天自是王孫桑梓切珍儲佳種待來年

又

揚州阮元 芸臺

讀梅溪養蠶詞因作小詩二首代

東奉答時在浙江試院

春來試士養蠶詞百首新詩繫我思爭似授衣詩句好養蠶比似養嬌兒

夏閒閱韓江雅

集詩有養蠶詞陳授衣句云蠶娘養蠶如養兒此言未經人道也

蠶利蠶工賴長官非徒稼穡甚艱難先
生更有驚人句十萬生靈正待餐

表忠觀落成阮芸臺閣學元秦小峴

觀察瀛俱見過感賦奉呈

先王功德在錢塘七百年來民未忘碧瓦
重新明社火金書自昔降天閭巍巍豐碣

文如鑄肅肅彤庭草亦香共愛南屏山色
近祠門猶為立斜陽

同作

嘉興 錢楷 裴山

至杭州日聞秦小峴觀察陪阮閣
學學使遊湖代東二首

詩人出處例西湖地美天教管領殊露
冕行知春有腳星車坐見氣如珠同尊

我輩懷秦七

詩見蘇

蠟屐平生羨阮孚使節

雙清今作合鶯花魚鳥見曾無

不勞五馬與雙鳧出郭傳呼屏路隅左

右但宜佳士坐

謂梅溪

主賓羸似道人孤谿

山勝濟拚遊遍風雨春晴放客迂歎我

素衣遲不值十年別夢柳絲紆

又

揚州

阮

元

芸臺

丙辰春日秦小峴觀察招遊湖上

晚過表忠觀適錢裴山同年過訪

未值有詩見投作此以報並寄梅

溪

天使浮雲自往還春晴喜借一舟閒共

舒中禁鐙前目來看西湖雨後山吾輩

冠裳煙水上君家祠宇竹松閒願將千

首新題句都就詩人仔細刪

錢楷

次日學使報章述及晚謁表忠觀

賦謝次韻二首兼示梅溪

湖上行春去復還歸鞭愛趁夕陽閒荒

祠五色雲生牖開府羣公義似山近蒙當事哀金

重金塔攷餘懷古地學使有先忠懿王金塔榻本考輶軒題

入採風閒學使下車即以表忠觀落成命題通省諸生賦詩不下千餘首千篇儻

許光家乘憑仗登高鉅手刪

使君衣錦過家還學使自山左移節吾浙嘗乞假掃墓畫舫風

流待詠閒韻事並傳修北海學使在山左重修鄭康成祠堂

碑文快讀繼眉山適學使出示重修表忠觀記簪裾色壯

松篁裏文學風維吳越閒獨有吾宗勤

述德行勝鐵券攷哀刪時梅溪以鐵券攷見貽

嘉慶丙辰九月八日至臨安拜武肅

王墓

太廟山前秋正深
功臣塏上月初臨
一邱虎踞當城郭
十道龍蟠自古今
不見靈旗來故國
尚餘石馬卧松陰
居民說起前王事
緩緩山歌唱不禁

男

曰奇 曰祥 益生 偉堂 謹校字

梅花溪詩草卷之二

丙辰

三七

松花溪詩集

卷二

蘇東坡詩集卷之二

蘇東坡詩集卷之二



